

## PAOT TE KŌMĒN TEXANŌN YŌG TIKMŪ'ŪN PU TAPPET KAX'ĀMI I

<sup>1</sup> 'Ūgmŭn Paot. 'Āte' kax'āmi nŭhŭ' tappet, yā 'āxop pu kax'āmi', yā Kunnix kopa kuxa mām xop pu' kax'āmi kōmēn Texanŏn tu', yā yŭmŭg 'Ātak Topa yŏg xop pu', yā yŭmŭg xuxyā Yeyox Kunnix yŏg xop pu' kax'āmi'. Xinax te 'āxop pe'paxex xix Tīmŏn te' kamah. Pu yā Topa xa hāmmaxnā', xayīy 'ākuxa mām.

*'Āxop kuxa mām Topa kopah*

<sup>2</sup> 'Ūgmŭ'āte Topa pu hām'āktux mōkumak mōg, hu: “Kunnix kopa kuxa mām xop pu 'āmax.” Kaxīy. Yā 'āxop pu' max Topah. 'Ūgmŭ'āte Topa pu 'āxop 'āktux mōkumak mōg.

<sup>3</sup> Hamŭn, 'ŭgmŭ'āte yāy 'Ātak Topa pu hām'āktux, tu hāmpe'paxex, 'āxop kuxa mām ka'ok, hu hāpxopmā max xohix. 'Āxop te' nŏy putup pax, hu 'āxop te hāpxopmā max punethok. Xate yŭmŭg xuxyā Kunnix hip kumaknāg. Hā kaxīy yŭmŭ'āte hāmpekpaxex, tu Topa pu hām'āktux.

<sup>4</sup> 'Ūkxape xop, Topa te 'āxop putup pax, tu tikmŭ'ŭn xohix kopa 'āxop yīmŏgātux, tu 'āxop mīy Topa yŏg tikmŭ'ŭn xe'e'. Hā kaxīy 'ŭgmŭ'āte pe'paxex, tu Topa pu hām'āktux.

<sup>5</sup> Hōmā 'ŭgmŭ'āte xa Topa yŏg hām'āpak max'ax 'āktux. 'Ūgmŭ'āte nŏm 'āktux, tu hāpxopmā ka'ok xe'ēgnāg, tu Topa Koxuk mŭtik xa Topa yŏg

hām'āpak max'ax 'āktux, tuk mūg kuxa mām ka'ok  
 Topa yōg hām'āpak max'ax kopah. Hōmāg mūg tihi  
 'āxop kopah, ha xatek mū yōg hāpxopmā max'ax  
 pēnāhā', yāg mūn max xa'.

<sup>6</sup> Xate 'ūgmūg max pēnāhā', xix yūmūg xuxyā  
 Yeyox yōg, tu nō' max putuk. 'Ūnōy te 'āxop kute'ex  
 kummuk, pa 'āxop te Topa yōg hām'āpak max'ax  
 paha', tu 'ākuxa hittup, yā Topa Koxuk te 'ākuxa  
 hittupmāhā'.

<sup>7</sup> 'Āxop max, ha 'āmax pēnāhā Kunnix kopa kuxa  
 mām xop te hāpxexka Māxenōn tu', xix hāpxexka  
 Genex tu', tu nō' max kamah, yā 'āxop putuk.

<sup>8</sup> Hamūn, 'āxop te yūmūg xuxyā Yeyox 'āktux  
 hāpxexka Māxenōn tu', xix hāpxexka Genex tu', yā'  
 xohix yīmap te' yūmmūg, 'ākuxa mām ka'ok. Putep  
 nōy 'āktux putup 'ūgmū'āte'? Puxi'.

<sup>9</sup> Hōmāg mūg tihi 'āxop kopah, ha 'āxop te topa ko-  
 mut xop nīm, tu ta Topa xe'e pe 'āmōg, ha tikmū'ūn  
 xohix te 'āyīmap te' xupak, tu hām'āktux.

<sup>10</sup> Xate Topak-tok hip, Yā pexkox tu yīxop-tup  
 Topak-tok. Hōmā Topa te yāy kutok Yeyox putpu'  
 hīnnāhā'. Yeyox te yūmūg mōy putup, 'ihā Topa gāy  
 'ūkummuk xop mūtik.

## 2

### *Paot te hāpxopmā max kōmēn Texanōn tu'*

<sup>1</sup> 'Ūkxape xop, hōmāg mūg tihi 'āxop kopah, tu  
 hāpxopmā max, 'ap kummuk mīy'ah, 'a yāg mūg  
 hitop ti'ah 'āxop kopah.

<sup>2</sup> Hōmā tikmū'ūn tek mūg kute'ex kummuk  
 komēn Pinio tu', tuk mūg māmōg, pa hāpxip 'ihāg  
 mūg mōg, tu mōktu 'āxop tuk mūg mōxaha 'ōnte

kōmēn Texanōn tu', ha kōmēn Pinio yōg tikmũ'ūn tek kute'ex kummuk, 'āxop te' yūmmūg. Pa yūmũ yōg Topa tek kuxa hittupmāhā', ha 'āte Topa yōg hām'āpak max'ax 'āktux.

<sup>3</sup> 'Ūgmũ'āte Topa yōg hām'āpak max'ax 'āktux, tuk mũ'āte pe'paxex kummuk 'ohnāg, tuk mũ'āte 'ōg hāpxop xak 'ohnāg, tuk mũ'āte 'āxop kupex 'ohnāg.

<sup>4</sup> 'Ūgmũ'āte putep mūn 'āktux? Topa te nō putup, 'ūgmũ'āte nōm 'āktux mōkumak mōg. Hamūn. Topa tek mūg putup, tuk mũ'ā Topa yōg hām'āpak max'ax hōm, tuk mūg mō'pok, ha 'āte tikmũ'ūn xohix pu nōm 'āktux. 'Ūgmũ'āte putep mūn 'āktux? 'Ok pe tikmũ'ūn te nōm putup pax hām'āktux? 'Ok pe Topa te nōm putup pax hām'āktux? Yā tikmũ'ūn yōg'ah, pa Topa tek mũ yōg putup'ax kopit.

<sup>5</sup> 'Āxop te' yūmmūg. Hōmāg mūg tihi 'āxop kopah. 'Ak mũ'āte xa hā xape komut'ah. 'Ūgmũ'āte 'āxop kupex 'ohnāg. 'Ok 'ūgmũ'āte hām'āktux max, pa 'ōg hāpxop putup? 'Āmhok. 'Ak mũ'āteputup'ah 'ōg tayūmak. Topa te' yūmmūg.

<sup>6</sup> 'Ak 'ūgmũ'āteputup'ah, puyīy tikmũ'ūn 'ūgmūg 'āktux max. 'Agmũ'āte 'ōg hām'āktux max xak 'ohnāg, xix tikmũ'ūn nōy yōg kamah.

<sup>7</sup> 'Ūmax, pu Kunnix yōg mō'pok xop tikmũ'ūn yōg hāpxop xak, pak mũ'āte nōm hā xak 'ohnāg, 'a' xat'ax xop putuk'ah, pak mũ'āte xa' hāpxop popmāhā', yā 'ūn tek-tok pu' popmā'ax putuk.

<sup>8</sup> 'Ūgmũ'āte 'āxop putup pax, hu xa Topa yōg hām'āpak max'ax 'āktux, xix 'āxop pu yāy mūn popmāhā, yāg mũ'āte 'āxop ka'ogāhā'.

<sup>9</sup> Hamūn, 'ūkxape xop, xate' yūmmūg. Hōmāg mūg tihi 'āxop kopah, tuk mũ'āte hāpxopmā max

punethok. Mãyõn mōg tox hãg mũg hãm, xix 'ãmñỹ hã, nũy pop hok 'õg hãpxop xix 'õg tayũmak, tuk mũ'ãte xa Topa yõg hãm'ãpak max'ax 'ãktux.

10 'Ãxop te' pẽnãhã', xix Topa te' pẽnãhã', 'ũgmũ'ãte hãpxopmãhã max 'ãxop pu', yã Kunnix kopa kuxa mãm xop pu'. Yãg mũ'ãte hãpxopmã max xe'ẽgnãg, xix hãpxopmã yok. 'A' hãpxopmã kummuk 'ũm mĩy'ah.

11 'Õgmũ'ãte 'ãxop xohix hãg tehe', yã 'ãtak te yãy kutok hã' tehe putuk. 'Ãxop te' yũmmũg.

12 'Õgmũ'ãte 'ãxop xapit, tu 'ãxop kuxa hit-tupmãhã', tu 'ãxop xapit, xayĩy hãpxopmã max. Topa te nãm putup pax. Topa te 'ãxop yĩmõgatux, xayĩy Topa yõg tikmũ'ũn xop mõkukox, xayĩy Topa max xe'ẽgnãg pẽnã'.

13 Hõmãg mũ'ãte xa' Topa yõg hãm'ãpak max'ax 'ãktux, ha 'ãxop te' xupak, tu 'ãyĩpkox pip. Xate' pe'paxex, yã Topa yõg hãm'ãktux, 'a' tikmũ'ũn yõg'ah. Hamũn, Topa yõg. Topa te hãpxopmã max 'ãxop kopah, yã' kuxa mãm ka'ok xop kopah, ha mõktuk mũg hittup, tu Topa pu hãm'ãktux, hu: "Ãmax. 'Ãmax nãm tikmũ'ũn pu.'" Kazĩy.

14 'Õkxape xop, hõmã Yoneo xop te Yeyox Kunnix yõg tikmũ'ũn xop xohik-te'ex kummuk hãpxexka Yonex tu', xix 'ãxape xop te 'ãxop kute'ex kummuk kamah, yã' nõy putuk.

15 Hõmã Yoneo xop te yũmũg xuxyã Yeyox putex, tu Topa pupi hãm'ãktux xop kix, ha' xakix, tu ta hõnhã yũmũg kute'ex kummuk kamah. Topa te nãm xop putup'ah. Nãm te tikmũ'ũn xohik-te'ex kummuk.

16 Hamũn, 'ũgmũ'ãte Yoneo xop kũnãpa pip xop pu Topa yõg hãm'ãpak max'ax 'ãktux. Yã Topa yõg hãm'ãpak max'ax te tikmũ'ũn kuxa mãmãhã Topa kopah, ha Topa te tikmũ'ũn kuxa kummuk xit, nũy kuxa max mõ'tat, 'ũyãnãn tu'. Ha ta Yoneo xop tep-tup, nũy nõm hã hãm'ãktux kuxyã'. Hã kaxĩy Yoneo xop te hãpkummuk mĩy xexka', ha' gãy Topah, tu nõm kopit, nũy yõg kummuk hã yãnãn.

### *'Ūgmũ'ãte 'ãxop xak*

17 'Ūkxape xop, hõmã yũmũg yãy xatat hãpxip kutõgnãg hã. Yũmũg yãy xatat, pak mũ'ãte 'ãxop pekpaxex punethok, tu 'ãxop xak nãm, tu 'ã hak mũg mõg putup pax.

18 'Ūgmũ'ãte 'ã hak mõg putup pax. 'Ūgmũn Paot, 'ã hak mõg putup punethok, pa Hãmgãyãgnãg tek kummugã', hak mõg 'ohnãg.

19 Yã hamũn, yũmũg xuxyã Yeyox te putpu' nũn putup, 'ĩhã 'ãxop pip putup Yeyox keppah, tu ta 'ãte hãpxop max hip putup, ha 'ãxop tuk mũg kuxa hittup putup, tuk mũ'ãte 'ãxop 'ãktux xexkap-tup, yã xut'ax 'ãktux putup. Yã mõ'tat'ax 'ãktux putup.

20 Hamũn, 'ũgmũ'ãte 'ãxop pekpaxex punethok, tu 'ãxop tuk mũg kuxa hittup.

## 3

1 Hõmã yũmũg yãy xatat, hak mũ'ãte 'ãxop xak. 'Ãte yãy xatat hã tot 'ohnãg, huk nox xip kõmẽn 'Atẽn tu',

2 nũy 'ã ha mõ'kutnãhã Tĩmõn, yãg taknõy, yã Topa pu' hãpxopmã max 'ũgmũtik, nũy Kunnix yõg hãm'ãpak max'ax 'ãktux. 'Ãte 'ã ha nõ mõ'kutnãhã',

pu 'āxop mūtik tu hāpxopmā max, xayīy 'ākuxa mām ka'ok nōy nā mōg,

<sup>3</sup> xayīy 'āxop xe hāpkummuk mīy hok, tikmū'ūn te 'āxop kute'ex kummuk hah. Yā hamūn, xate' yūmmūg, Topa tep-tup, pu tikmū'ūn yūmūg kute'ex kummuk.

<sup>4</sup> Hōmāg mūg tihī 'āxop kopah, tu 'āxop mūtik hām'āktux, hu: “Nōm tek mū'āk-te'ex kummuk putup.” Kaxīy. Yā hāpxip 'ihā tikmū'ūn tek mū'āk-te'ex kummuk. Hamūn.

<sup>5</sup> 'Āte' hip'ax hā' tot 'ohnāg, hu 'ā ha mō'kutnāhā Tīmōn, pu 'ākuxa mām yūmmūg. 'Ok Hāmgāyāgnāg te 'āmōgāhā? 'Ok 'ūgmū yōg hāpxopmā'ax koxyōy? 'Āte' yūmmūg putup.

<sup>6</sup> Ha ta' mōg, Tīmōn, tu putpu' nūn, tu hām'āktux, 'ākuxa mām ka'ok Topa kopah, tu 'āxop te yāy putup pax, xix Topap-tup pax. Tīmōn te hām'āktux, 'āxop tek mū'ā hām'āktux max, tu xatek mūg pēnāp-tup pax. Hamūn, 'ūgmū'āte 'āxop pēnāp-tup pax kamah.

<sup>7</sup> 'Ūgmūg xūy, yā nōm tek mūg kute'ex kummuk, pak mū'āte 'āxop yōg hāpxopmā'ax 'āpak, huk kuxa hittup. 'Ūkxape xop, 'ūgmū'āte 'ākuxa mām ka'ok 'āpak, tuk mūg kuxa hittup.

<sup>8</sup> Topa yōg putat max hā 'āxop mōg kuma mōg, kopxik kuxa hittup.

<sup>9</sup> 'Ūgmū'āte Topa pu hām'āktux, hu: “Āmax, timū'ūn pu'. Tikmū'ūn max, kopxik mūg kuxa hittup. Āmax. Puxi'.” Kaxīy.

<sup>10</sup> Hāptup kopxix Topa pu hām'āktux xexka xix 'āmnīy, tu hām'āktux, hu: “Āpu 'ūgmūg xat, 'ūgmūg mōg tikmū'ūn hah.” Kaxīy. Hamūn, 'āxop hak mūg

mōg putup, nŷy 'āxop pu hāmyūmmūgā xate nōm yūmmūg 'ohnāg Topa yōg putat max yōg hāpxop.

11 'Ūgmū'ātep-tup, pu yūmūg 'Ātak Topa 'āxop tuk mūg mō'pok, xix yūmūg xuxyā Yeyox 'āxop tuk mūg mō'pok.

12 'Ūgmū'ātep-tup, xayīy 'āxop yāy putup pax nōy nā mōg, xix 'āxop tikmū'ūn xohix putup pax nōy nā mōg, ha mōktu 'āxop tek mūg putuk, yāg mū'āte 'āxop putup pax.

13 Ha mōktu Topa te 'āxop ka'ogāp-tup, ha 'āxop maxp-tup, tu 'āxop max xe'ēgnāg yūmūg 'Ātak Topa keppah, 'īhā yūmūg xuxyā Yeyox te putpu' nūn putup 'ūyāy yōg xop mūtik.

## 4

### *Hāpxopmā'ax max, Topa te nōm putup*

1 'Ūgmū'āte xe hām'āktux. Hāg mū'āte xa' yūmmūgāhā hāpxopmā max, Topa te nōm putup, ha 'āxop te hāpxopmā max. 'Āte xa hām'āktux xix yūmūg xuxyā Yeyox te xa hām'āktux, hu: “Āpu hāpxopmā max mīy nōy nā mōg.” Kaxīy.

2 Yā hamūn, hōmā yūmūg xuxyā Yeyox tek mūg mō'pok, 'ūgmū 'āxop pu hāmyūmmūgā'. Xate' yūmmūg.

3 Topa tep-tup, xayīy 'āxop hāpxopmā kummuk kux, nŷy ta Topa putuk. Topa tep-tup xayīy 'ānōy hā xupxet hok.

4 'Ūmax, pu tik yāy pu xetut xax, nŷy nōm mūy, tu hāpkummuk mīy 'ohnāg. Tikmū'ūn max te nōm putup.

<sup>5</sup> 'Ūkummuk, pu tik yāy putup'ax kummuk hā xetut xax, yā puknōg xop putuk, yā nōm te Topa yūmmūg 'ohnāg xop putuk.

<sup>6</sup> 'Ūkummuk, pu tik yāy taknōy kute'ex kummuk, nūy yāy pu' xetut xax. Hōmāg mū'āte xa' hām'āktux, hu: “Pa 'ātix, yūmūg xuxyā Yeyox te nōm kummuk yānān putup.” Kaxīy.

<sup>7</sup> Topa te yūmūg xat, 'ūyīy yūmū nōy hā xupxet hok. Pa Topa te yūmūg xat, yūmūg hāpxopmā kummuk kux, nūy ta Topa putuk.

<sup>8</sup> Tep te nū hāmyūmmūgā'ax 'āpak 'ohnāg? 'Ok tikmū'ūn yōg hāmyūmmūg'ax 'āpak 'ohnāg? 'Āmhok. Yā Topa yōg. Yā Topa te xa' hōm Topa Koxuk.

<sup>9</sup> 'Ok 'āte xa putup pax'ax kax'āmip-tup, yā Kunnix kopa kuxa mām xop yōg putup pax'ax? 'Āmhok. 'A 'āte xa kax'āmip-tup'ah. Hōmā Topa te xa' yūmmūgāhā', xayīy xohix putup pax,

<sup>10</sup> ha 'āxop tep-tup pax Kunnix kopa kuxa mām xop xohix hāpxexka Māxenōn tu'. 'Āpu tikmū'ūn xohixp-tup pax nōy nā mōg.

<sup>11</sup> 'Āpu hāmyīmtuk, nūy 'ōg hāpxopmā mīy, nūy ta 'ānōy yōg hāpxopmā'ax kute'ex hok, nūy ta 'āhām, xayīy 'ōg tayūmak pi'. Yā hōmā 'ūgmū'āte xa nōm 'āktux.

<sup>12</sup> Hā kaxīy nōm xop kuxa mām 'ohnāg Yeyox kopa te 'āmax pe'paxex putup, ha ta' nōy te 'āxop hā' te 'ohnāg putup.

### *Yūmūg xuxyā Yeyox te putpu' nūn putup*

<sup>13</sup> 'Ūkxape xop, 'ūgmū'āte-tup, xayīy hāmyūmmūg xakix xop yōg hāpxopmā'ax, nūy xakix xop hā 'ākuxa xūy hok, nūy 'āpota xexka hok, nūy xate' putuk hok nōm te hāpxop max hip 'ohnāg.



14 Yūmūg kuxa kopa' yūmmūg, Yeyox xok xe'e', tu putpu' hi', tu putpu' nūn putup, ha Topa te Yeyox mūtik xakix xop nūnnāp-tup, yā nōm kuxa mām ka'ok Yeyox kopa xop nūnnāp-tup.

15 Topa Xexka te nōm 'āktux, hak mū'āte nōm 'āktux. Yūmūg xuxyā Kunnix te putpu' nūn putup, 'ihā xakix xop putpu' hip-tup, tu' mōg hāmāxap putup Kunnix hah, hak-nāy tu hi xop mōg putup Kunnix hah.

16 Pexkox yōg nū'pok xop yōg xat'ax te' xat ka'ok putup, ha' nōy te Topa yōg mīxux xop tut kaxyāp-tup, 'ihā yumū xuxyā Kunnix mūn te pexkox tu' yīxop-tup! Ha ta putpu' hip-tup xakix xop, nōm kuxa mām ka'ok Kunnix kopah.

17 Hag-nāy tu nōmhā hi xop mōgāp-tup pepix kamah, tu mōktu' xohix yāy tu nū' nāp-tup hāmōy xexka kopah, nūy yūmūg xuxyā Kunnix mūtik mōg. Hā kaxīy nōm te Yeyox mūtik tip-tup, tu xe' yāy xatat putup'ah.

18 Āpu tikmū'ūn kuxa hittupmā nū hām'āktux hā.

## 5

### *Āpu Yeyox te putpu' nūn'ax hip*

1 'Ūkxape xop, hām 'ūm hā' xip'ax nōm hāpxop? Mō'āgmū'ax 'ūm? Āmnīy 'ūm? Putep putuk putup hāpxop xohix, 'ihā putpu' nūn putup Yeyox? Hām 'ūm hā'? Āte' yūmmūg'ah, hu' kax'āmip-tup'ah.

2 Yūmūg xuxyā Yeyox yōg hāptup xupep putup, ha Yeyox te putpu' nūn putup, yā xupxet'ax xupep putuk, 'ihā tikmū'ūn te nōm hip 'ohnāg. Āxop te' yūmmūg.

<sup>3</sup> Tikmũ'ũn te hãm'ãktux putup, hu: “Yãmyĩptuk nũnte. 'A' hãm xũy 'ũm pip'ah. Yã' max hãpxop xohix.” Kaxĩy. Pa hãpxip 'ohnãg 'ĩhã hãm xũy pip mō'ka'ok, tu xohix koxyōy, yã 'ũn tek-tok put xũy putuk, yã' xupep mō'ka'ok. 'Ap nũpap-tup'ah tikmũ'ũn.

<sup>4</sup> Pa 'ãkuxa kopa hãpkoxtap 'ohnãg, hu Yeyox yōg hãptup hip, yã Yeyox te putpu' nũn hip, yã 'ap xupxet'ax xupep'ax putuk'ah xa'.

<sup>5</sup> 'Ăxop xohix yã kuyãnãm yōg tikmũ'ũn, yã hãptup yōg yã 'ãkuxa tup. Yũmũg mũn 'a 'ãmnĩy yōg'ah, 'a hãpkoxtap yōg'ah, pa hãmyũmmũg.

<sup>6</sup> 'Ăpu mō yũmũ yōn hok, yã 'ap nōy putuk'ah. 'Ăpu yũmũ pa ka'ok, nũy hãmpẽnã', nũy Yeyox hip.

<sup>7</sup> 'Ămnĩy 'ĩhã mō'yōn pax tikmũ'ũn, yã 'ãmnĩy 'ĩhã paptux xop paptux. Yã' kuxa mãm 'ohnãg xop te kaxĩy.

<sup>8</sup> Pa 'ãxop yã hãptup yōg. Pu yũmũg pa ka'ok, nũy hãmpẽnã', nũy Yeyox hip. 'Ăpu yũmũ mō'tat kuxa mãm ka'ok'ax xix putup pax'ax. Yã nōm te xonat yōg pipkup hã kep xax putuk. 'A hãpxop kummuk te mō'nãp-tup'ah. 'Ăpu yũmũ mō'tat kama Topa yōg hãpxop max hip'ax. Hamũn, Topa te tikmũ'ũn kuxa kummuk xit, nũy kuxa max mō'tat, 'ũyãnãn tu'. Ta nōm te xonat xop yōg pipkup hã kuxxax putuk. 'A hãpxop kummuk te mō'nãp-tup'ah. 'Ăpu mō'tat.

<sup>9</sup> Topa te yãy ha yũmũg xãnãhã', nũy yũmũ'ã tu' gãy hok, pa yũmũg xuxyã Yeyox Kunnix hã yũmũg kuxa kummuk xit, nũy kuxa max mō'tat, 'ũyãnãn tu'.

<sup>10</sup> Yeyox te yũmũg pupi' xok, 'ũyĩy nũ mũtik 'ãti', pe yũmũg pip 'ĩhã putpu' nũn Kunnix, pe yũmũg

xakix, 'ĩhã putpu' nũn Kunnix.

11 'Ãpu yãy mûtik hãm'ãktux, pu yĩpkutuk tu nõg. 'Ãpu tikmũ'ũn kuxa hittupmã'. Yã xate nõm mĩy nõmhã. 'ãpu 'ãhup hok.

*'Ãpu hãpxopmã te kaxĩy*

12 'Ûkxape xop, 'ũgmũ'ãte xa' xak, 'ãpu hãm'ax xupax, nõm te hãpxopmã max 'ãxop kopah. Yã Topa te nõm yĩmõgãtux, puyĩy 'ãxop mõgã', puyĩy 'ãxop pu hãmyũmmũgã'.

13 'Ãpu nõm hãm'ax xupax xexka'. 'Ãpu nõm putup pax, tute hãpxopmã max hah. 'Ãpu yãy kix hok.

14 'Ûkxape xop, 'ũgmũ'ãte xa' xak. 'Ãpu tuknõgnãg xop pu hãm'ãktux, pu tu hãm. 'Ãpu 'üyĩpkutuk xop kuxa hittupmã'. 'Ãpu pu'uk xop hã 'ãtehet. 'Ãpu 'üyõg hãpxopmã max hip punethok.

15 'Ãpu hãpkummuk mĩy'ax hã yãnãn hok. Pa 'ãpu tikmũ'ũn pu hãpxopmã max 'ãxop. 'Ãpu hãpxopmã max mõkuma mõg tikmũ'ũn xohix pu'. 'Ãpu yãy pu hãpxopmã max 'ãxop.

16 'Ãpu yã mãyõn mõg tox hã 'ãkuxa hittup pax xix 'ãmnĩy tox hã 'ãkuxa hittup pax.

17 'Ãpu Topa pu hãm'ãktux mõkuma mõg.

18 'Ãpu hãpxop xohix 'ãyĩmap 'ãktux Topa pu', hu: "Puxi'. 'Ãmax xohix pu'. 'Ãmax." Kaxĩy, Hamũn, Topa tep-tup nõm hãpxopmã'ax 'ĩhã 'ãxop mõg Yeyox Kunnix mûtik.

19 Yã Topa Koxuk yõg hãpxopmã'ax kuxyã hok.

20 Hãmpẽ'ãpaxeh hok: “Yã' kummuk, Topa pupi hãm'ãktux xop te hãm'ãktux,” kaxĩy. Yã' max 'ũyõg hãm'ãktux.

21 Pa 'ãpu hãpxopmã'ax xohix kopit. 'Ãpu hãpxop max putyõn hok, xix hãpxopmã'ax max putyõn hok.

22 'Ãpu hãpxop kummuk mĩy'ax xohix kux.

23 Topa te yũmũ'ã' hõm hãmyĩptuk'ax. 'Ãtep-tup, pu Topa yãy pu 'ãxop xohix pop, yã 'ũyõg xop xe'ẽgnãg 'ãxop. 'Ãtep-tup, pu Topa 'ãxop pẽnã max, yã 'ãkoxuk pẽnã', xix 'ãkuxa, xix 'ãyĩn, xayĩy 'õg hãpkummuk mĩy'ax pip putup'ah, 'ĩhã' putpu' nũn putup yũmũg xuxyã Yeyox Kunnix.

24 Hamũn, Topa tep-tup nõm hãpxopmã'ax. Tute 'ãxop xãnãhã', tu 'ãxop tu' xip ka'ok. Topa tep-tup.

25 'Õkxape xop, 'ãpu Topa pu 'ũgmũn 'ãktux.

26 'Ãpu taknõy xohix pu hãm'ãktux, hu: “'Õgmũ'ãte 'ãxop xaxok 'ohnãg.” Kaxĩy. 'Ãpu xape xop yãy kep hã mũy, yã taknõy max putuk.

27 'Ãte xa' xak, ha yũmũg xuxyã Yeyox te' xupak, 'ãpu nũ tappet mõkupix taknõy xohix pu', xix tukũm xohix pu', yã Kunnix kopa kuxa mãm xop pu'.

28 Puyã yũmũg xuxya Yeyox Kunnix xa hãmmaxnã'.

Tu ta tu' kux.

**Topa Yōg Tappet**  
**New Testament in Maxakalí (BR:mbl:Maxakalí)**

copyright © 2011 Wycliffe Bible Translators, Inc.

Language: Maxakalí

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Maxakalí

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 18 Apr 2025 from source files  
dated 29 Jan 2022  
a212b59e-62d7-5a38-9773-b0ce1d5b248b